

E Guia ku Bo Yu ta Falta

"Mayornan mester dediká mas guia na nan yunan. No mester laga e muchanan hasi loke nan kier. Mayornan mester pone regla i pèrkurá pa e muchanan kumpli tambe ku e reglanan aki," segun Pancho Cicilia, hefe di Servisio di Enseñansa i Formashon (SEF), a trese dilanti resientemente.

Bon bisá! Yunan tin mester di e guia di nan mayornan. Ma hopi biaha, manera señor Cicilia a trese dilanti, mayornan ta negleshá nan responsabilidad. E negligensia aki ta sosodé pa varios rason.

Un motibu ku yunan ta falta guia ta pasobra e mayornan no t'ei. Hopi biaha e fenómeno aki a krea rais den hubentut di e mayornan, ora nan for di un akto di piká, a pone un yu riba mundu. E mener irresponsabel ku tabata asina kayente pa demostrá su supuesto "amor," awor no tin basta amor pa kubri e gastunan ku el a okashoná. Obligá di buska trabou pa kria e yu, e mama hóben su tempu pa e mucha ta limitá pa despues di trabou òf den wikènt. Di otro banda, algun mama ta pone propio interes promé ku e yu presioso, i ta bai traha pa haña entrada ékstra. E mama no t'ei pa duna e yu atenshon ora e yega kas di skol. E mes ta yega kansá di trabou, ku poko tempu i energia pa dediká pa su yu. Tin bes e mama no t'ei.

Ma mayoria biaha ta e tata ku ta ousente. Hopi hende hòmer tin e idea ku nan ta solamente responsabel pa engendrá i supsidia nan yunan. Bèrdat, un famia tin mester di sèn pa biba. Pero e yu tin mester di algu muchu mas balioso. E tin mester di abo, tata. E tin mester di bo tempu, e tin mester di bo atenshon i e tin mester di bo guia. Tantu tata komo mama ta responsabel pa kria e yunan. Yunan ta falta guia di nan mayornan pasobra hopi biaha nan no t'ei.

Ma tin ora, siendo presente, mayornan no ta inbertí tempu pa guia e yunan. Nan ta trata e yunan komo un molèster, un interupshon di nan skema di propio interes, un inkonbinensia nesario. Pesei na lugar di inbertí tempu den bida di e yu, hunga ku n'é, tuma tempu pa haña sa presis kiko e ta pensa, must'é kiko ta bon i kiko ta malu, e mayornan ta manda e yu krèsh, pròp e dilanti televishon, òf lag'é kana anochi lat riba kaya. Ku un mentalidat asina no ta di straña ku yunan ta falta guia di nan mayornan.

Un otro motibu ku yunan ta falta guia ta pasobra e mayornan ta negleshá nan responsabilidad di disiplina di e yunan. Señor Cicilia a trese dilanti ku mayornan hopi bes ta muchu tolerante pa ku nan yunan. "Hopi mayor ta laga nan yunan hasi loke nan ke i esaki no ta bon," Pancho Cicilia a deklará.

Beibel ta bisa meskos: "Un yu lagá pa su kuenta, ta pone su mama na bèrgwensa" (Proverbionan 29:15). Kuantu mayor awendia ta yora lat ta malai pasobra nan yu a kai den droga, ta biba pa paranda so, ta na estado sin ta kasá, kada ratu ta kambia trabou òf no ta interesá mes pa traha, ta será tras di trali, ta hiba un bida ku no ta sirbi...un bèrgwensa pa nan mayornan.

Dikon un yu ta sali asina? E mesun skritura ta duna e kontesta: "Bara i reprimimentu ta duna sabiduria, ma un yu lagá pa su kuenta, ta pone su mama na bèrgwensa." "Bara" ta referí na disiplina físiko mientras "reprimimentu" tin di hasi ku disiplina bèrbal. Esaki ta eksigí tempu, esfuerso, kurashi, amor, i konsistensia di parti di e mayornan. No ta fásil pa bisa bo yu "nò" anto para riba ku bo "nò" ta keda "nò" apesar di tur e yu su insistensia, kehamentu, sapatimentu, i yoramentu. Ta muchu mas fásil pa komplasé ku e yu su deseo. No ta dushi pa suta bo yu ora e ta desobedesé. E yu mester siña obedensia pa ku e guia ku e mayor ta dun'é. Palabra di Dios ta bisa ku e disiplinanan aki ta siña e yu "sabiduria," es ta e abilidad pa hasi desishonnan korekto.

"Instruí un mucha den e kamina ku e mester kana, i asta ora e bira bieu e lo no apartá su mes di djé" (Proverbionan 22:6). Yunan tin mester di e guia di nan mayornan, prinsipalmente pa guia nan den kamina di Dios, konforme ku e stèndertnan di Palabra di Dios. Si mayornan no dediká mas guia pa nan yunan, nan lo busk'é otro kamina, i muchu biaha e guia ei ta hiba nan den un mal kaminda.